

**Naul nga Pol Muli tevi
PILIMON
Batu nale nga mivsivseni lut
nga parmeteni naul ngel
puto suri**

Pilimon evi jinibb nga nijor sen milep, ko evi kele kalesia. Ni elik rrek ie Kolosi. Ko jinibb ne majingen sen san nga nisen Onesimas owlu lingi. Mian ko Onesimas mivini mĩlesi Pol, nga re wosenen mĩlik re naim ne nekaien. Ko Pol ela Onesimas vini ji Kristo, evi vajin kalesia. Ko Pol okoni vajin Onesimas nga pulwi van ji Pilimon, ko oli naul ngel tevi nga Onesimas putori suri. Ko Pol owra Pilimon sete pulolarsi Onesimas. Ko owra kele nga Pilimon pia-koni Onesimas pia-luwi kele van ji Pol ko pĩmejmajing sen pijpari nga Pol pia-ivel sisarow rege naim ne nekaien nga marrul totkoni ni rengen.

Pol owra “Erres” tevi Pilimon

¹ Inu Pol, nga mĩelik re naim ne nekaien ngel suri Iesu Kristo, ko Timoti kele nga mivi tasi kerr, nomorwera “erres” tevi nik, Pilimon. Kerr itul ngel, rramlik rege majingen sansan kobbong, ko komru nomormerrenim elep. ² Ko nomorwera “Erres” tevi joji komru Apia, ko tevi natu kamru Akipas, nga kem namivi jinibb ne nuval ne gortien sansan kobbong. Ko nomorwera “Erres” kele tevi kalesia nir nga marok-korti

rengé naim som. ³ Ko ngel evi loten suk, nga merrenien ko demat se Atua Tata ko se Iesu Kristo nga mĩla mauren tevi kerr, piptevim.

Merrenien ko nosurien se Pilimon

⁴ Pilimon, daron nga molot e, tetajer nomok-rrorrmí ník, ko nomok-werai “Erres” tevi Atua, ⁵ suri nomok-runge nosp̃en suri merrenien nga komok-merreni lenglengen jiníbb se Atua níř, ko nosurien som nga muto mĩterter rengé Numal Iesu. ⁶ Nomok-lot suri nga ník komok-kortí tevi kem rengé murrún ne nosurien, ko numrrení kele nga kuprongwos kele nanu nga marres níř nga Atua moklai tevi kerr nga rramkortí tevi Kristo. ⁷ Niaken suk, merrenien som ela neiren nga mílep tevík, ko ololí norrorrmien suk eterter kele vajín. Ko murrún som ngok oklolí jiníbb se Atua níř arunge erres luwí vajín rengé norrorrmien ser.

Pol ongoni Pilimon nga pĩlai lweni Onesimas

⁸ Ko suri nanu ngok, ko suri rromor-kortí pa tevi Iesu Kristo, nurongwos ñerij pĩterter tevim nga kuplolí ko wor nanu ngel nga musorsan mĩrres nga kuplolí. ⁹ Ko suri memrrénim, sete numrrení ñerij pĩterter tevim, ko bongonim kobbong. Inu le Pol, nutra le pa, ko lelingenok nulík re naim ne nekaién ngel suri Iesu Kristo. ¹⁰ Ko nungonim suri Onesimas, nga mívi jiníbb ne majíngen som womu, mian ko muwlu língim. Ko daron nga m̃elik malum re naim ne nekaién ngel, ko m̃elai vini jí Kristo. Ko ní erpe natuk ko vajín. ¹¹ Womu Onesimas sete orongwos pulolí majíngen som nga mĩrres san, ko lelingenok

vajin orongwos puloli majingen nga marres pilep se nik ko se inu kele, suri evi vajin kalesia.

¹² Ko lelingenok nukoni ni pulwi vinuk jim. Ko norrrormien suk oto malum bbong tevi. ¹³ Ko numrreni poro pilik mun iel sapon tevik, nga ni pila milnge nik nga pimejmajing se inu rengen naim ne nekaien ngel nga melik ren suri nospen nga mirres. ¹⁴ Ko inu sete numrreni nga bosortonim nga kuploli nanu ngok nga pirres tevik pirkok. Nik kuploli suri nik ko wor kumrreni. Ko sete nurongwos bololi nanu san poro nga nik sete kupmarong. ¹⁵ Rrek kutor jabble Onesimas beblen, nga daron nga kupla lweni, ko pilik tevim pijpari tuwi ngok vini vajin. ¹⁶ Ko lelingenok ni asi kele pa jinibb ne majingen. Ni evi vajin tasi kerr nga mirres, nga inu memrreni milep. Ko rrek nik kupmerreni kele wor piasa, suri ni evi jinibb ne majingen som, ko okorti kele tevi Numal. ¹⁷ Ko poro kopoklesi inu pirpe nga rromorivi niaken kobbong, erres nga sete kuplolarsi ni, ko kuploli pirpe nga kupla inu vinuk rengen naim som. ¹⁸ Poro ni ololi esij pa tevim rengen nanu tama san, rreknga nivnon sen san oto jim, erres nga nik kuplingi inu nisek puto rengen nivnon sen nen. ¹⁹ Nale ngel nuli tevi inu nevrek kobbong. Inu Pol bea-wuli lweni nivnon ngok tevim. Ko sete kupmalie nga nik nivnon som oto pa jik, suri inu nuvi batun nga nik kumtor sweri pa mauren ji Kristo. ²⁰ O tasik, kupla se inu rengen nanu ngel, suri kerru rromorkorti pa tevi Numal. Kuploli inu borngen pirres luwi rengen norrrormien suk.

²¹ Nomok-uli nale ngel vinuk jim, ko nurong-wose erres nga nik kuploli nanu nga inu mon-goni jim. Ko nurongwose nga nik kuploli kele wor piası sev nga mowrai ngel. ²² Ko re daron mawos nen kele, kuploli milnguk san puto metmet teraik rengo naim som. Suri tetajer inu nomok-rrorrmı nga Atua okrunge verusen se kami jıjle ko pia-la lweni inu vinuk ji kami kele.

Bongsi nale se Pol

²³ Epapras ngok, nga moklik rengo naim ne nekaien tevi inu ²⁴ suri İesu Kristo, tevi Mak, ko Aristakas, ko Demas, ko Luk, nga marok-majıng tevi inu, arwera “Erres” tevim. ²⁵ Ko ngel evi loten suk, nga merrenien se İesu Kristo Numal puto tevi kami jıjle. Nuwra “Remse kami”.

Naul On Nga Mimerr Uripiv

The New Testament in the Uripiv language of Vanuatu

copyright © 1996 Wycliffe Bible Translators

Language: Uripiv (Uripiv-Wala-Rano-Atchin)

Dialect: Uripiv

Translation by: WBT

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 22 Nov 2019

96303ce7-aa0a-513c-862d-415957a542e1